

Broj: 76/12  
Sarajevo: 23.02.2012.

Izvršni odbor Nogometnog saveza Federacije Bosne i Hercegovine, na osnovu člana 32. Statuta NS FBiH, na sjednici održanoj 23.02.2012. godine u Sarajevu, donosi sljedeći

**K O D E K S**  
**o ponašanju članova organizacije**  
**Nogometnog saveza Federacije BiH**

**Član 1.**

Kodeksom o ponašanju članova organizacije NS Federacije BiH (u daljem tekstu: Kodeks) regulišu se pravila ponašanja klubova, igrača, službenih lica (sudija, delegat, kontrolor suđenja), funkcionera Saveza i klubova, članova organa i ostalih dužnosnika i nogometnih djelatnika, u vezi sa svim nogometnim aktivnostima u okviru djelovanja NS FBiH. Kodeks afirmira pozitivna nogometna načela, a posebno fer-plej, sportski respekt, korektno i sportsko ponašanje svih članova NS Federacije BiH.

**Član 2.**

Članovi organizacije NS FBiH obavezni su pravovremeno i dosljedno primjenjivati odredbe nogometnih propisa prema svim sudionicima nogometnog sporta, te su obavezni čuvati i štiti integritet NS FBiH i ostalih nogometnih institucija i pojedinaca u okviru NS FBiH.

**Član 3.**

Članovi organizacije NS FBiH ne smiju pokušati uticati na bilo koji način na klubove, sudije, delegate, kontrolore suđenja, trenere, igrače i dr. da postupaju suprotno odredbama ovog Kodeksa.

Klubovi ne smiju kontaktirati sa članovima organa (Komisija/komesara/povjerenika) koji vrše delegiranje, a pogotovo ne smiju vršiti pritisak i unaprijed isticati subjektivne zahtjeve vezano za suđenje ili obavljanje dužnosti delegata i kontrolora suđenja za određene klubove, određene utakmice, sudije i drugo, što može dovesti do favoriziranja određenog kluba ili pojedinca te negativno uticati na regularnost takmičenja.

**Član 4.**

Članovi organa (komisije/komesari/povjerenici) koji vrše delegiranje, ne smiju održavati kontakte sa klubovima i pojedincima iz klubova vezano za takmičenje, delegiranje, moguće favoriziranje klubova ili pojedinaca, isticanje određenih zahtjeva vezano za delegiranje, klubove, utakmice i pojedince, kao i isticanje finansijskih zahtjeva, te na taj način negativno uticati na regularnost takmičenja.

Dužnosnici/funkcioneri Saveza, članovi organa i tijela (komisije) i kontrolori suđenja ne smiju izlaziti izvan okvira obavljanja dužnosti člana organa Saveza, te ne smije kod sudija, kontrolora suđenja ili delegata isticati zahtjev za suđenje na određenoj utakmici koje može dovesti do favoriziranja određenog kluba ili pojedinca. Dužnosnici/funkcioneri Saveza ne smiju uticati ni vršiti pritisak na članove organa (Komisije ili inokosne organe) vezano za određivanje službenih lica, za klubove ili određene utakmice, te na taj način negativno uticati na regularnost takmičenja.

Svi kontakti između klubova i pojedinaca iz klubova sa članovima organa koji donose odluke vezano za takmičenje, suđenje ili delegiranje, mogu se vršiti isključivo korespondencijom u pismenom obliku i službenim putem preko Sekretarijata NS FBiH, osim ako drugačije nije propisano propisima NS FBiH i NS/FS BiH za konkretne slučajeve.

### **Član 5.**

Službenim licima: sudijama, delegatima i kontrolorima suđenja zabranjuje se bilo koji kontakt sa klubovima vezano za utakmice na kojima obavljaju službenu dužnost.

Sudijama, delegatima i kontrolorima suđenja zabranjuje se svaki kontakt sa klubom vezano za suđenje, spavanje, ishranu i drugo.

Sudijama, delegatima i kontrolorima suđenja zabranjuje se svaki kontakt sa klubom vezano za bilo kakva finansijska potraživanja, izuzev dostavljanja i isplate službenog naloga za stvarne troškove, nakon utakmice na koju su određeni i obavili službenu dužnost.

Delegat utakmice u slučaju ukazane potrebe može obavljati kontakte sa klubom za organizaciju utakmice, sigurnost svih aktera ili izvršavati nalog NS FBiH, vezano za moguća finansijska potraživanja Saveza od klubova.

Službeni kontakt sudije, delegata i kontrolora suđenja sa klubom smije početi dolaskom na stadion 90 minuta prije utakmice, kako to nalažu propisi NS FBiH i NS/FS BiH.

Službeni kontakt iz prethodnog stava, ne smije se ostvariti na način suprotan ovom Kodeksu, a što bi moglo negativno uticati na regularnost takmičenja.

### **Član 6.**

Sudija, delegat i kontrolor suđenja samostalno organizira vlastito putovanje na utakmicu, ishranu i moguće noćenje, te troškove za navedeno ne smije ispostaviti klubu, niti na bilo koji način naplatiti od kluba.

Delegat i kontrolor suđenja na utakmice Prve i Druge lige FBiH ne smiju putovati u istom vozilu sa sucima utakmice, a delegat i kontrolor suđenja putuju odvojeno.

U slučaju potrebe noćenja prilikom putovanja na utakmicu sudija, delegat i kontrolor suđenja ne smiju koristiti prenoćište/hotel u gradu iz kojeg su klubovi, niti pri tome ostvarivati kontakte sa klubovima vezano za utakmicu i prenoćišće.

### **Član 7.**

Članovi organizacije NS FBiH ne smiju pokušati, a niti uticati na članove organa i tijela koji donose odluke u vezi sa takmičenjem, radom i odlučivanjem disciplinskog ili apelacionog organa, suđenjem i dr., ili druge odluke iz djelokruga rada organa.

Članovi Izvršnog odbora suzdržat će se od bilo kakvog kontakta sa sudijama, delegatima i kontrolorima suđenja, vezano za odredbe ovog Kodeksa, a posebno ako se radi o suđenju ili obavljanju dužnosti delegata ili kontrolora suđenja prije, za vrijeme i nakon utakmica klubova čiji su oni članovi.

### **Član 8.**

Klubovi su obavezni da svaku utakmicu igraju na pobjedu, u skladu sa pravilima Fer-pleja.

Klubovi su obavezni svaku utakmicu započeti sa najkvalitetnijim sastavom kojim raspolažu, u skladu sa važećim odredbama Pravilnika o nogometnom takmičenju.

Klubovi ne smiju održavati međusobne kontakte koji prevazilaze pravila sportskog držanja i ponašanja, pravila fer-pleja i sportskog respekta ili su suprotna odredbama Statuta NS FBiH, a koji mogu dovesti do neregularnosti u takmičenju ili narušavanja digniteta ili jedinstva NS FBiH, što se posebno odnosi i na zabranu dogovaranja ili blo kojeg lažiranja ishoda utakmica koje igraju (tzv. sistem „tri za tri“ i drugo).

### **Član 9.**

Članovi nogometne organizacije, a posebno funkcioneri NS FBiH, članovi organa i tijela NS FBiH, sudije, delegati i kontrolori suđenja su obavezni voditi računa o ugledu i ponašanju u javnom i privatnom životu, o ugledu nogometne institucije čiji su članovi, kao i o ugledu cjelokupne nogometne organizacije.

Članovi nogometne organizacije: funkcioneri, članovi organa i tijela, službena lica (Izvršni odbor, komisije i pravna tijela, sudije, delegati, kontrolori suđenja i dr.) prilikom obavljanja funkcija, ne smiju od klubova, nogometnih institucija ili pojedinaca primati poklone ili druge naknade, koje nisu utvrđene propisima, što se ne odnosi na sportske suvenire.

#### **Član 10.**

Članovi organizacije NS FBiH ne smiju u izjavama za medije vrijeđati ili omaložavati institucije Saveza, ni pojedine članove tih institucija, niti smiju prenositi neistine i pogrešne podatke o radu nogometnih institucija i pojedinaca, članova nogometne organizacije NS FBiH i NS/FS BiH.

Članovi klubova i ostali nogometni/fudbalski radnici ne mogu nakon utakmice davati uvredljive izjave za medije o sudijama i suđenju, kao i o radu ostalih službenih lica, na način koji šteti ugledu i ličnom integritetu službenih lica.

Primjedbe na rad službenih lica na utakmici i radu organa koji donose odluke u vezi sa suđenjem i takmičenjem mogu se dostaviti u pismenoj formi rukovodstvu takmičenja i drugim nadležnim organima, u skladu sa važećim propisima NS FBiH i NS/FS BiH.

#### **Član 11.**

Treneri, igrači i ostali nogometni radnici mogu davati izjave o utakmici samo iz svog djelokruga rada (način igre, organizacija utakmice, ponašanje gledalaca i dr.).

Izjave za medije o radu institucija nogometnog sporta (saveza, klubova i njihovih organa) mogu davati isključivo osobe koje su propisima istih nadležne za davanje izjava u ime tih institucija.

Izjave i komentare o odlukama i aktivnostima organa saveza medijima mogu davati predsjednici organa i tijela, pri čemu nije dozvoljeno komentarisati ili davati izjave o radu drugih organa.

Zaposleni radnici u nogometnim institucijama ne mogu davati izjave za medije i komentarisati odluke organa bez saglasnosti rukovodilaca tih institucija.

#### **Član 12.**

Članovi nogometne organizacije ne mogu svojim radnjama pozivati nogometnu ekipu ili pojedinca da napusti teren iz bilo kojih razloga.

Članovi nogometne organizacije ne mogu na bilo koji način podsticati igrače na neizvršavanje reprezentativnih obaveza.

Svaki član nogometne organizacije obavezan je spriječiti korištenje nedozvoljenih stimulativnih sredstava od strane igrača.

#### **Član 13.**

Svaki član organizacije NS FBiH dužan je pridržavati se Statuta i ostalih propisa NS FBiH i NS/FS BiH.

Službena lica: sudije, delegati, kontrolori suđenja i ostali članovi organizacije NS FBiH (klubovi, dužnosnici i dr.) dužni su pridržavati se odredaba Statuta, da sve sporove koji proizilaze iz Statuta NS FBiH i NS/FS BiH, propisa, direktiva i odluka donesenih na osnovu Statuta ili ugovora, u posljednjoj instanci iznose pred isključivu nadležnost nezavisnog i nepristrasnog arbitražnog tribunala (CAS u Ženevi) do osnivanja posebnog tribunala na teritoriji BiH, koji će davati konačna rješenja sporova bez učešća redovnog suda.

#### **Član 14.**

Povrede odredaba ovog Kodeksa predstavljaju disciplinski prekršaj, koji se, na osnovu prijave koju mogu podnijeti svi članovi nogometne/fudbalske organizacije, sankcionišu prema odredbama Disciplinskog pravilnika NS/FS BiH i odluka IO NS FBiH, a svi članovi su dužni prijaviti bilo koji vid učestvovanja u neregularnosti, nagovaranju ili podstrekavanju što bi moglo dovesti do neregularnosti u takmičenju ili radu.

#### **Član 15.**

Kodeks stupa na snagu danom donošenja i objavit će se u službenom glasniku NS FBiH.

DOPREDSJEDNIK  
Dr. Huso Golač sr.